

萬泉縣志目錄

卷首輿圖考

縣境

縣治

學宮

公署

學堂

孤山

卷一輿地志

沿革表附

疆域

城池

鄉鎮寺觀
集會附

公署
倉儲公所附

山川津梁附

物產

卷二政治志

學宮
學校附

祠祀
壇壝廟附

貢賦
雜稅附

戶口
里甲附

風俗

卷三政治志

職官

宦績

選舉

仕籍附

卷四人物志

鄉賢

仕蹟忠烈附

文儒

孝友

義行

卷五人物志

列女

卷六藝文志

文類

卷七藝文志

文類

卷八藝文志

詩類

卷終雜記附

陵墓

坊表

古蹟
八景附異政

流寓

仙釋

祥異

萬泉縣藝文志卷之六

藝文上舊志

文類

創建后土廟碑記

宋天禧四年

裴

瑾

見鄉賢

左氏傳曰國之大事在祀與戎且祀者有國之徵猷化民之至教故王者以父道事天母儀事地郊社之禮三載一舉莫不粢盛豐潔牲牷肥腍噐幣畢陳金石交奏所以昭其孝而息乎民也皇上時值之十一載天下無事百谷用成先是東兗士庶章奏繼陳乞登岱封勅以紀太平之年

我后乃勉徇輿情頌詔海內告有事於岱岳越三載舉隆
典備法駕復展義于汾睢是時稼穡之瑞草木之祥靈鶴
慶雲靡不迭現蓋以聖君虔奉柔祇恭孝祖考軫孤恤物
之所昭感也有以見大宣皇明以燭其幽鮮行之禮告畢
龐鴻之慶普施遐邇同歡鳥獸咸若故能致社稷之延長
躋黎元於福壽者也今當縣聖母廟者本睢上后土之祠
從其新號今謂太寧在昔聖王親遇靈應掃地以祭精誠
上達實受其福千載而下經歷漢唐躬謁之君國典所載
此不復書且王化之攸行政教之所及民之法則若草從

風蓋上能恭事天地嘗命中貴大臣親詣靈祠秘傳聖祝
春禘秋嘗為民祈福歲不愆期故庶民觀上勤心恪志亦
以四時設祭而陳其薦也故不渝於風雨展於寅奉倚倦
絕聞忽一日耆耄相謂曰今吾輩倉廩實衣食足田無災
害家獲乂安無征戍以役乎丁務耕桑以成其業雖承帝
力豈非神降之福哉且汾睢本廟地遙奈衰殘之步艱於
往來今欲率羣情懋衆力揆吉位創新祠奉蘋繁以達其
心致潢污以表其意使不乏其祭享豈不為稟靈秀而大
陰陽耶衆聞厥議忻懌僉同於是召信士以謀其始祝靈

著以卜其方遂得縣之坤兌隅為吉地乃命剪除荆棘剗
削榛蕪經之營之以嚴以飭於以見神聽降靈人心響答
商農工賈靡不樂推一之歲版築之功設二之歲瓦木之
用興三之歲堂殿之修備四之歲塑繪之象成陳力者子
來施財者霧集歡聲動而谷響喜氣積而雲浮長廊遠布
以翼舒畫棟高橫而虹起朱碧交映羅仙仗以駢闐帳幄
深嚴仰神儀而端睟孤峰俯峙共起嶽岑洪浪四流遙連
浩汙則一境之內比屋之人覩良緣之告成賀大功之克
就無不誠潔而來既望之儼然咸祭之如在乘福介祉知

聞然而彰也今邑侯公下車以來二周星律以清白廉勤
爲己任示勸化正直以臨民吏畏其明奸服其政綽然有
古令尹之風且一邑仰瞻靈之靈覩廟貌之勝謂不揚盛
事何以示將來不刻瑣珉何以傳不朽亦猶成山九仞虧
功於一簣也余因邑君示命鄉社見託以著斯文弗敢遜
謝不才聊述淺昧用紀歲時在大宗天禧四年五月十五
日也

雙泉記

宋神宗熙寧五年

鄧忠臣

孤山之東南有祠曰風伯雨師右有泉二源在山之上下
介鄉之人常謂此泉可飲數千戶歲旱禱能興雲雨蓋有
德於民者世之人未之或知也廣陵朱康叔行縣與余同
謁祠下因探源留觀久之顧謂余曰茲勝境也惜其未名
可名曰雙泉因書於石余以物之為利質不在大地不在
顯今涓涓之水不盈澗壑隱翳於窮山幽岩之下老圃灌
畦孺子濯足曾不得與五嶽四瀆並祀而能興雲雨於百
里之內百里之人特見百里之內霑沐膏澤而已蓋不見

於百里之外者又安知不油然而沛然不崇朝而遍天下耶
余疑雙泉為天地闕泯其迹姑施陰功潛德於不用之際
將有護持待人而後發歟何昔之湮晦如此噫微康叔名
之則將與行潦之水奚異哉

重修宣聖廟記

金泰和三年

張邦彥

昔穆叔與范宣子論及立德立功立言之事後人為穆叔之說者曰大上立德意謂黃帝堯舜是也其次立功則禹稷是也其次立言則周任史佚臧文仲之屬是也古之所謂死而不朽者蓋其大指如此夫人得其一則猶映照萬古而稱頌不忘况吾夫子於此數事直能兼之者耶夫上律天時下襲水土使萬物並育而不害然後小德川流大德敦化淵淵其淵浩浩其天若夫子者可謂能立德矣周道凌遲王綱絕紐諸侯不度僭亂者多楚子問鼎之輕重

晉侯請隧而驕矜吾夫子憤其如此則作為春秋正名分
使君臣父子各得其宜姦諛斃矣重戮於九泉之下潛德
蝕矣光華於萬代之表袞冕在身不足喻其褒榮夏於市
不足方其貶故亂臣賊子惕息畏懼寔吾夫子之力也昔
楊墨塞路孟軻辭而闢之昂黎猶曰其功不在禹下況吾
夫子者也其若是者可謂立功矣演十翼而贊爻象正五
始而修春秋序書則斷自唐虞刪詩則取合禮義制禮作
樂經緯人道身雖不用於一時典則傳之於萬世若夫子
者可謂能立言矣故天下郡縣春秋二祀與社稷相配而

禮又通之自孔子沒迄今幾二千歲矣然其子孫封爵相襲世世不絕雖周秦漢魏之君繼世皆有天下及乎時代革易世數綿遠其子孫之承襲者尚蔑以聞吾夫子獨以布衣之屬傳世久遠與天地相為終始非大聖人者其能若是乎廼者河中萬泉簿劉君從謙字光甫世為解之安邑人以明經擢進士第為中甲魁四方士子多從之者自泰和元年冬十一月下車其為政也寬不太柔猛不太虐舉措有法條教可觀曾未踰時而闔境之民皆畏愛矣翌日躬詣學校視其棟宇傾欹墉垣圯壞及睹前宰公趙瞻

與攝縣令鄭滋碑刻所載修學之事至甚明白然兵火之餘踪跡蕩盡近縣令丁公侃亦嘗修之又且制度隘陋不與縣郭相稱公用慨然欲加崇飾乃暨邑中進士張琚丁勗及居民謝天祐等相與謀曰學校者化民之本仁義道德之所興修也禮樂教化之所宣布也人材之所作成也風俗之所變易也廣而言之則致君澤民之道皆出其中其為功也不止肄業之人擢巍科取青紫而已吾與增崇壯麗之公等若之何皆曰先生一登臚士大邑斯臨夫承流宣化乃其職也果欲為意豈惟琚等為幸甚多一邑之

民皆受賜矣乃以泰和三年夏四月揆日營建公則罄其俸給所餘不問家之有無一皆出之以佐經費於是邑中之民富者助財貧者助力如棟宇樞杙之資墜塗楮墨之用則富民大家之所樂輸也如持畚荷鍤之勞赴工服役之事則閭巷少年之所樂為公雖旦夕往詣其中特為經畫加指示爾曷嘗以力而強之耶易曰悅以先民民忘其勞其是之謂乎凡為屋八十間正殿在前講堂在後堂之左右翼以兩齋士子之進修者此焉遊處又為兩廡直接賢堂祭器不可以徒列也為庫房以存貯之膳食不可以

無所也為厨室以饌饌之賢堂二所分設於正殿之前又
於其南起四賢堂皆所以褒大先儒也正殿基構煥然一
新兩廡門樓悉補其弊餘則劉侯創之耳螻蛄鳴而工始
興元鳥歸而能事畢且使觀旂采藻之人削槩懷鉛之士
望其殿宇崢嶸制度雄壯莫不巍巍我我聳其瞻視者矣
嗚乎劉君起身白屋試於治民官職猶未甚尊俸祿猶未
甚厚乃能捐罄囊橐毅然惟以修學為事者蓋以奉宣教
化主張吾道之為任也噫其亦難乎哉使一州一縣官長
僚屬皆若劉君之用心則四海之內猶弗治者未之有也

落成之日邑人皆欲刻石頌德以傳不朽乃托僕之鄉人
聞喜簿孔祖湯者特來謁文且曰郭侯李繁建學於處州
而昌黎韓愈為之文秦尉袁弁修學於扶風而駕部郎中
程浩為之記今夫劉君功業不減向之袁李而未有韓愈
程浩為之發揚先生於此獨無意哉僕曰素無學問訥鈍
於辭加之平生黃卷久不用心尚欲鋪張鴻藻而發揚劉
君乎但為抽毫紀寔以需史氏之採擇可也孔曰斯足矣
乃援春秋之例而喜為之書謹記